



28. oktober 2013

Inatsisartut suleriaasianni § 37 naapertorlugu Naalakkersuisunut makkuninga apeqquteqaateqarpunga:

Kalaallit Nunaata inuisa nunap inoqqaavisut taagorneqarsinnaajunnaarnerarlugit Peqqissutsimut Attaveqarnermullu Naalakkersuisup paasinninnera Naalakkersuisut isumaqataaffigivaat?

Taamaassappat, taava qanga kalaallit nunap inoqqaavisut isigineqarunnaarpat? Taamaassappat, taava tamanna inatsisitigut Kalaallit Nunaannut aammalu nunap inoqqaavisut nunat tamat akornanni ataatsimiittarfiini assigiinngitsuni peqataasarnitsinnut qanoq sunniuteqassava?

Taamaassappat, taava apeqqut taanna pillugu danskit naalakkersuisui oqaloqatigineqarsimappat aammalu tamatuma qanoq sunniuteqarnissaa nalorninaallisillugu oqaloqatigiissutigineqarpa?

Taamaassappat, taava ILO-p isumaqatigiissutaa nr. 169 aammalu nunat inoqqaavisa pisinnaatitaaffii pillugit Naalagaaffiit Peqatigiit nalunaarutaat Kalaallit Nunaannut soqutiginaataarullutillu pingaaruteqarunnaassappat?

Naalakkersuisut isumaqarunik taaguut nunap inoqqaavi Kalaallit Nunaata atorsinnaajunnaaraa taava tamanna pillugu nunap inui Naalakkersuisut kalerrilersaarpaat?

Naalagaaffiit innuttanut pisussaaffii tungavigalugit inuiaat inuiaqatigiillu assigiinngissutaat Naalakkersuisut qanoq paasivaat?

(Inatsisartunut ilaasortaq Naaja H. Nathanielsen)

Tungavilersuut

Oktoberip 16-iani Naalakkersuisuni ilaasortaq Steen Lynge Facebookikkut nittartakkami allappoq 2009-mi Kalaallit nunaata namminersulerneratigut kalaallit inuiattut naatsorsuutigineqartalersut taamaattumillu taaguut nunap inoqqaavi ator neqarsinnaajunnaartoq. Nunap inoqqaavisut pisinnaatitaaffeqartutut, pingaartumik

kultureqarnermut inooriaaseqarnermullu tunngatillugu, isigineqarunnaarutta tamanna
Kalaallit Nunaannut annertuumik sunniuteqartussaavoq.
Maannangaaq kissaatigissavara apeqqutikka ullut suliffiit qulit iluanni akineqarnissaat.